


上

女科輯要













史記  
精輯

史記  
兩卷



堯封沈氏所著醫經讀傷寒論讀簡明切當穴爲善  
本尚有女科輯要一書世罕傳本原稿爲余外舅徐  
虹橋先生補注珍藏先生早歸道山余受室後得見  
其書頗多入理深談發前人所未發者今年楊素園  
明府聞有此稿命爲借鈔余謂婦兄文珊曰君子之  
孝也亦務其大者遠者而已寶守遺編莫若傳諸不  
朽友珊許焉爰不揣鄙陋稍加參訂而公諸世云  
道光庚戌仲冬棘人王士雄書于潛齋





Blank manuscript page with vertical columns.



女科輯要目次

卷上

經水

崩漏

帶下

求子

受胎

辨胎

妊娠諸病

附妊娠藥禁



附泰西諸說

卷下

產

產後諸病

乳證

雜病

諸方



女科輯要卷上

明王士雄孟英參

沈堯封先生輯

錢塘後學徐政杰藹埤補注

男 之藩友珊校

經水

素問女子七歲腎氣盛齒更髮長二七而天癸至任脈通太衝脈盛月事以時下

沈按天癸是女精由任脈而來月事是經血由大衝而來經言二七而天癸至緣任脈通斯時大衝脈盛月事亦以時下一順言之一逆言之耳故月



女科要略卷一  
事不調不來及崩是血病。咎在衝脈。衝脈隸陽明。  
帶下是精病。咎在任脈。任脈隸少陰。蓋身前中央  
一條是任脈。背後脊裡一條是督脈。皆起於前後  
兩陰之交會陰穴。難經明晰。靈素傳誤。帶脈起于  
率脇。似束帶狀。人精藏於腎。腎繫於腰背。精欲下  
泄。必由帶脈而前。然後從任脈而下。故經言任脈  
爲病。女子帶下。

雄按。俞東扶云。經言男子二八而腎氣盛。天癸至。  
精氣溢瀉。若天癸卽月水。丈夫有之乎。蓋男女皆  
有精。易謂男女構精可據。然指天癸爲精。亦不妥。



天癸爲精不當又云精氣溢瀉矣。後賢講受孕之道。有陽精陰血先至後衝等說。亦謬。夫男女交接。曾見女人有血出耶。交接出血是病。豈能裹精及爲精所裹哉。大約兩精歡暢。百脈齊到。天癸與男女之精偕至。斯入任脈而成胎耳。男胎女胎。則由夫婦之天癸有強弱盈虛之不同也。吾友徐亞枝云。如沈氏說。一若天癸卽精者。如俞氏說。一若血與精之外。別有一物。所謂天癸者。竊謂天癸者。指腎水本體而言。癸者水也。腎爲水臟。天一生水。故謂腎水爲天癸至。謂至極也。猶言足也。女子二七。



男子二八腎氣始盛而腎水乃足。蓋人身五臟屬  
五行。惟腎生最先而腎足最遲。腎衰最早。故孩提  
能悲能喜能怒能思而絕無慾念。其有情竇早開  
者。亦在腎氣將盛。天癸將至之年。可見腎氣未盛。  
癸水未足。則不生慾念也。迨腎氣衰。癸水絕。則慾  
念自除矣。解此段經文者。當云女子必二七而腎  
水之本體充足。任脈乃通。太衝之脈始盛。月事因  
而時下矣。夫前陰二竅。溺之由水竅者。無論矣。其  
由精竅者。皆原于天癸者也。月水雖從衝脈下。謂  
爲天癸之常可也。洩精成孕。是任脈之施受。謂爲



天癸之能可也。帶下乃任脈之失擔任。謂爲天癸之病可也。然則稱月水爲天癸。似亦無不可也。前賢解此。皆重讀上二字而略下一字。惟將至字當作來字看。遂至議論紛紜耳。

王冰曰。男以氣運。故陽氣應日而一舉。女以血滿。故陰血從月而一下。

8 月事不調

素問。天地溫和。則經水安靜。天寒地凍。則經水凝泣。天暑地熱。則經水沸溢。卒風暴起。則經水波湧而騰起。



褚澄曰。女子天癸既至。踰十年無男子合。則不調。未  
踰十年。思男子合。亦不調。不調則舊血不出。新血誤  
行。或潰而入骨。或變而爲腫。或雖合而難子。合多則  
瀝枯虛人。產乳眾則血枯殺人。

雄按此論甚不盡然。存其意可也。惟產乳眾而血  
枯。卒死者頗多。然吾鄉吳醴香大令徐夫人。半產  
三次。不計外。凡生十男四女。竝已長成。而夫人年  
踰五旬。精力不衰。猶能操家政而撫馭羣下也。  
方約之云。婦人不得自專。每多忿怒。氣結則血亦結。  
一雄按此至言也。氣爲血帥。故調經必先理氣。然理



氣不可徒以香燥也。蓋鬱怒爲情志之火，頻服香燥，則營陰愈耗矣。

趙養葵云：經水不及期而來者，有火也。宜六味丸滋水。如不及期而來多者，加白芍、柴胡、海螵蛸，如半月或十日而來，且縣延不止者，屬氣虛，宜補中湯。如過期而來者，火衰也。六味加艾葉。如脈遲而色淡者，加桂。此其大略也。其間有不及期而無火者，有過期而有火者，不可拘於一定。當察脈視稟，滋水爲主，隨證加減。

雄按：婦人之病，雖以調經爲先，第人秉不同，亦如



其面有終身月汛不齊而善於生育者有經期極準而竟不受孕者雄於女科閱歷多年見聞不少始知古人之論不可盡泥无妄之藥不可妄試也

辨色及痛

趙養葵曰衝任藏精系胞又恃一點命門之火爲之主宰火旺則紅火衰則淡火太旺則紫火太衰則白所以滋水更當養火甚有乾枯不通者雖曰火盛之極亦不宜以苦寒之藥降火祇宜大補其水從天一之源以養之使滿又曰紫與黑色者多屬火旺亦有虛寒而黑色者不可不察若淡白則無火明矣



色白屬火  
衰氣虛參  
間有不宜補  
火者

沈按王宇泰以寒則凝。既行而紫黑。定非寒證。然  
投熱藥取效。十中嘗見一二。色白無火。亦屬近理。  
然間有不宜補火者。嘗見元和一婦。經水過期十  
日方至。色淡。穩婆據此。投肉桂藥數劑。經水過多。  
遍身發黃。不能飲食。身熱脈數。竟成危候。此是丹  
溪所謂經水淡白。屬氣虛一證。要之臨診時。須細  
察脈象。復參旁證。方識虛實寒熱。儻有疑似證中。  
有兩說者。先用其輕劑。如色淡一證。先用補氣法。  
不效。再投補火。庶無差誤。錄葉氏辨證于左。  
葉氏曰。血黑屬熱。此其常也。亦有風寒外乘者。十中



黑色有寒  
熱虛實  
分須宜脈  
症至參

淡色不可  
專以寒  
而論有  
極矣

當見一二。蓋寒主收引。小腹必常冷痛。經行時或手足厥冷。唇青面白。尺脈遲。或微而虛。或大而無力。熱則尺脈洪數。或實有力。參之脈證為的。

雄按色淡竟有屬熱者。古人從未道及。須以脈證互勘自得。但不可作實熱論。而瀉以苦寒也。更有奇者。方氏婦產後經色漸淡。數年後竟無赤色。且亦結塊。平時亦無帶下。人曰疝瘕。余診之脈。更數口苦。而時有寒熱。與青蒿白薇黃芩柴胡當歸龜甲龜板芍藥烏鰂枸杞地骨皮等藥出入為方。服百劑而愈。此僅見之證矣。



滑伯仁曰。經前臍腹絞痛。寒熱交作。下如黑豆汁。兩  
尺脈澀。餘皆弦急。此寒溼搏於衝任。寒溼生濁。下如  
豆汁。與血交爭。故痛。宜辛散苦溫血藥。  
杰按。辛散血藥。是川芎之類。苦溫血藥。是艾葉之  
類。

李氏曰。經水帶黃。混濁者。溼痰也。

丹溪曰。經將行而痛者。氣之滯也。用香附。青皮。桃仁。  
黃連。或川抑氣散。四物加胡索。丹皮。條芩。又曰。經  
將來腹中陣痛。乍作乍止。著血熱氣實也。四物加川  
連。丹皮。



經前腹痛

杰按抑氣散出嚴氏係香附四兩陳皮一兩茯苓炙甘草兩半也爲末每服二錢治婦人氣盛於血變生諸證頭暈膈滿取內經高者抑之之義注昂謂是方和平可用若補血以平陽火亦正治也又經後作痛者氣血俱虛也宜八珍湯又成塊者氣之凝也

沈按經前腹痛必有所滯氣滯脈必沉寒滯脈必緊溼滯脈必濡兼寒兼熱當參旁證至若風邪由下部而入于脈中亦能作痛其脈乍大乍小有時隴起葉氏用防風荆芥桔梗甘草虛者加人參各



經前後俱痛

壹錢焙黑取其入血分研末酒送神效

又按經前後俱痛病多由肝經而其中更有不同  
脈弦細者是木氣之鬱宜逍遙散及川棟小茴橘  
核之類脈大者是肝風內動體發紅塊者是肝陽  
外越俱宜溫潤戴禮亭室人向患經前後腹痛  
連及右足體發紅塊脈大右關尺尤甚己卯秋予  
作肝風內動治用生地四錢炒枸杞一錢細石斛  
二錢杜仲二錢乾淡薤蓉一錢麥冬一錢牛膝一  
錢歸身一錢五分炒白芍一錢服之痛止後於經  
前後數劑經來甚適不服即痛因作丸服此方屢



經來聲啞

用有驗

經來聲啞證。荀恒大兄長女嫁斜塘倪姓。早寡。體氣虛弱。每逢月事。聲音必啞。余用天冬、地黃、菟蓉、歸身等藥。病益甚。張口指畫。毫無一字可辨。卽於此方加細辛少許。以通少陰之絡。藥纔入口。其聲卽出。十餘劑後。桂附人味。尤調理。永不發。撮要經後目暗屬血虛。

目暗

汪石山曰。經行泄瀉。屬脾虛多溼。宜參苓白朮散。雄按亦有肝木侮土者。

醫氏曰。經行白帶。屬陽虛下陷。用參朮助陽之藥。



雄按亦有鬱火內盛者

月事不來

素問二陽之病發心脾。有不得隱曲。女子不月。其傳爲風消。其傳爲息奔者。死不治。

沈按二陽指陽明經言。不指臟腑言。二陽之病發心脾者。陽明爲多血之經。血乃水穀之精氣。藉心火煅煉而成。憂愁思慮傷心。困及其子。不嗜飲食。血無以資生。陽明病矣。經云。前陰總宗筋之所會。會於氣街而陽明爲之長。故陽明病。則陽事衰而不得隱曲也。太衝爲血海。並陽明之經而行。故陽



明病則衝脈衰而女子不月也。

雄按經水固以月行為常。然陰虛者多火。經每先期。陰愈虛。行愈速。甚至旬日半月而一行。更有血已無多而猶每月竭。蹙一行者。其涸也可立而待也。若血雖虛而火不甚熾。汛必愆期。此含蓄有權。雖停止一二年。或竟斷絕不行。但其脈不甚數者。正合坤主吝嗇之道。皆可無慮。昧者不知此理。而但憑月事以分病之輕重。聞其不行。輒欲通之。竭澤而漁。不仁甚矣。

金匱云。婦人病。因虛積冷。結氣。經水斷絕。



張景岳云。經閉有血隔血枯不同。隔者病發于暫。通之則愈。枯者其來也漸。補養乃充。

沈按金匱三證。積冷結氣。有血不行也。景岳謂之血隔。積冷宜肉桂大辛熱之藥。導血下行。後用養榮之藥調之。氣結宜宣。如逍遙散或香附烏藥行氣之品宣之。虛者無血可行也。景岳謂之血枯。宜補。趙養葵補水補火補中氣三法。最爲扼要。雄按補水勿泥于六味。補火勿泥于八味。補中氣勿泥于歸脾。

寇宗奭曰。童年情竇早開。積想在心。月水先閉。蓋憂



思慮過度  
情志不遂  
心脾為病  
相火內熾

愁思慮則傷心。心傷則血耗竭。故經水閉也。火既受病。不能榮養其子。故不嗜食。脾既虛。則金氣虧。故發嗽。嗽既作。則水氣竭。故四肢乾。木氣不充。故多怒。髮鬢焦。筋痿。五臟以次傳遍。故卒不死。然終死也。比於諸勞。最為難治。

沈按此條亦從金匱虛字內分出。實有是證。但此證所願不得。相火必熾。非補水無以制之。六味地黃湯補陰瀉陽。固是妙法。然脾虛食減。倘嫌地黃泥膈。炒枯可也。不然以女貞易之。顧名思義。并瀉相火。



雄按此證最難治。六味礙脾。歸脾助火。惟薛一瓢  
滋營養液膏加小麥大棗遠志庶幾合法。一瓢又  
有心脾雙補丸亦可酌用。

婁全善曰。經閉有污血凝滯胞門一證。羅謙甫血極  
膏一味大黃爲末醋熬成膏服之。利一二行。經血自  
下。是婦人之仙藥也。

朱丹溪曰。肥人痰塞胞門。宜厚朴二陳湯。

沈按金匱論經閉有冷無熱。非闕文也。蓋天暑地  
熱。則經水沸溢。豈反有凝泣不來之理。潔古東垣  
降心火瀉三焦之說。不可盡信。卽骨蒸內熱亦屬。



陰虧非同實火之可寒而愈也。

雄按王子亨全生指迷方地黃煎以生地汁八兩熬耗一半內大黃末一兩同熬候可丸如梧子大熟水下五粒未效加至十粒治女子氣竭傷肝月事不來病名血枯蓋瘀血不去則新血日枯也卽內經烏鰂丸仲聖大黃蟄蟲丸之義耳後人但知彼血枯爲血虛而不知血得熱則瘀反用溫補豈能愈此血枯之病堯封亦爲此論母乃欠考。

8 淋漓不斷 一名經漏

陳良甫云或因氣虛不能攝血或因經行而合陰陽



外邪客於胞內

雄按亦有因血熱而不循其常度者

月事異常

經云七七而天癸竭有年過五旬經行不止者許叔微主血有餘不可止宜當歸散產寶主勞傷過度喜怒不時李時珍作敗血論三說不同當參脈證

李時珍曰月事一月一行其常也或先或後或通或塞其病也有行期祗吐血衄血或眼耳出血是謂倒經有三月一行是謂居經有一年一行是謂避年有一生不行而受胎者是謂暗經有受胎後月月行經



女科要略卷上  
而產子者。是謂胎盛。俗名胎垢。有受胎數月。血忽大下。而胎不隕者。是謂漏胎。此雖以氣血有餘不足言。而亦異常矣。

雄按有未及二七之年。而經水已行者。有年踰花甲。而月事不絕者。有無病而偶停數月者。有壯年而汛卽斷者。有帶下過甚。而經不行者。有數年而一行者。有產後自乳。而仍按月行經者。有一產而停經一二年者。秉賦不齊。不可以常理概也。

血崩

血大至日崩此是急病

素問陰虛陽搏謂之崩。許叔微云。經云天暑地熱。



經水沸溢。又云陰虛者尺脈虛浮。陽搏者寸脈弦急。是爲陰血不足。陽邪有餘。故爲失血內崩。宜奇效四物湯。或四物加黃連。

奇效四物湯

當歸

酒洗

川芎

白芍

炒

熟地黄

以上爲四物

阿膠

艾葉

黃芩

炒

各一錢

又云女人因氣不先理。然後血脈不順。生崩帶諸證。香附是婦人仙藥。醋炒爲末。久服爲佳。每服二錢。清米飲調下。徐朝奉內人徧藥不效。服此獲安。

杰按叔微理氣二字。專主怒氣鬱氣傷肝。故用香



附理氣以和肝。慎不可用破氣藥。

薛立齋云。肝經風熱。或怒動肝火。俱宜加味逍遙散。

當歸

白芍

柴胡

甘草

茯苓

白朮

丹皮

黑梔

加薄荷

薑棗煎

李太素曰。崩宜理氣降火。升提。

金匱云。寸口脈微而緩。微者衛氣疎。疎則其膚空。緩者胃弱不實。則穀消而水化。穀入于胃。脈道乃行。水入于經。其血乃成。營盛則其膚必疎。三焦絕經。名曰血崩。



趙養葵曰。氣爲陽主升。血爲陰主降。陽有餘則升者。勝血出上竅。陽不足則降者。勝血出下竅。氣虛者面色必白。尺脈虛大。

東垣云。下血證須用四君子補氣藥收功。

又云。人傷飲食。醫多妄下。清氣下陷。濁氣下降。乃生臃脹。所以胃脘之陽不能升舉。其氣陷下致崩。宜補中湯。

丹溪云。有涎鬱胸中。清氣不升。故經脈壅遏而降下。非開涎不足以行氣。非氣升則血不能歸隧道。其證或腹滿如孕。或臍腹疔痛。或血結成片。或血出則快。



止則悶。或臍上動。治宜開結。痰行滯氣。消汚血。

沈按衝爲血海。並陽明之經而行。故東垣丹溪皆主胃脘之陽不升。顧其病源各異。李曰妄下。朱云痰鬱有腹滿如孕。血出反快。止反悶。等證可認。妄下則無有也。非問不得。

戴元禮曰。血大至曰崩。或清或濁。或純下紫血。勢不可止。有崩甚腹痛。人多疑惡血未盡。又見血色紫黑。愈信爲惡血。不敢止截。凡血之爲患。卻出未出之際。停在腹中。卽成紫血。以紫血爲不可留。又安知紫血之不爲虛寒乎。瘀而腹痛。血行則痛止。崩而腹痛。血



住則痛止。芎歸湯加薑附止其血而痛自止。

薛立齋云。有婦患崩。過服寒藥。脾胃久虛。中病未已。寒病復起。煩渴引飲。粒米不進。昏憤時作。脈洪大。按之微弱。此無根之火。內虛寒而外假熱也。十全大補加附子。崩減。日服八味丸而愈。又有久患崩。服四物湯涼血劑。或作或止。有主降火。加腹痛手足厥冷。此脾胃虛寒所致。先用附子理中湯。次用濟生歸脾補中益氣二湯。崩頓止。若泥痛無補。則誤矣。

沈按。崩證熱多寒少。若血大至。色赤者。是熱非寒。儻色紫黑者。出絡而凝。其中有陽虛一證。經云陽



氣者衛外而為固也。營行脈中。衛行脈外。脈外之陽虛失於護衛。則脈中之營血漏泄。既出絡脈。凝而不流。漸漸變紫變黑。然必須少腹惡寒。方可投溫。

崩證極驗方

地榆 二錢 生地 四錢 白芍 三錢 川連 五

黃芩 一錢 甘草 八分 蓮鬚 一錢 丹

皮 錢半 黑梔 一錢 牡蠣 二錢 水煎服

一婦日服人參阿膠血不止。投此即效。因伊帶多。偶以苦參易芩。血復至。用芩即止。去連血又至。加



連卽止。

一婦患崩月餘。余診時大崩發暈幾脫。是方加人參一錢服之卽定。十劑而安。

一婦患此年逾五旬。投入參阿膠不效。一日用黃連五分甚不相安。一醫云是氣病。用酒炒香附歸芍丹皮黃芩牡蠣棗仁黑荊芥各二錢。鬱金一錢五分。橘皮一錢。上沉香磨沖三分。柴胡五分。棕櫚灰八分。煎服一劑。崩止。除去柴胡。棕櫚。荊芥。數劑食進。後加白朮爲散。服之作脹。減去卽安。

一崩證。少腹惡寒。用桂附八味丸收全效。



雄按經漏崩淋並由精竅出惟溺血從溺竅而下  
婦女雖自知然赧于細述醫者不知分別往往誤  
治更有因病汎愆而衝脈之血改從大腸而下者  
人亦但知爲便血也臨證均須細審

帶下與男子遺漏同治

素問任脈爲病男子內結七疝女子帶下瘕聚

又曰脾傳之腎名曰疝瘕小腸寃結而痛出白名曰

蠱

又曰少腹寃熱洩出白液

又曰思想無窮所願不得意淫于外入房太甚發爲



希下三卷  
異義不同

白淫

沈按帶下有主風冷入于腠絡者巢元方孫思邈  
嚴用和楊仁齋婁全善諸人是也有主淫熱者劉  
河間張潔古張戴人羅周產諸人是也有主脾虛  
氣虛者趙養葵薛立齋諸人是也有主淫痰者朱  
丹溪是也有主脾腎虛者張景岳薛新甫是也又  
有主木鬱地中者方約之繆仲淳是也其所下之  
物嚴主血不化赤而成張主血積日久而成劉主  
熱極則津液溢出其治法有用大辛熱者有用大  
苦寒者有用大攻伐者有用大填補者雖立論製



方各有意義。然其所下之物。究竟不知爲何物。惟  
丹溪云。婦人帶下。與男子夢遺同。顯然指着女精  
言。千古疑竇。一言道破。但精滑一證。所因不同。惜  
其所製之方。囿於痰火二字中耳。由是言之。白帶  
卽同白濁。赤帶卽同赤濁。此皆滑膩如精者。至若  
狀如米泔。或臭水不黏者。此乃脾家之物。氣虛下  
陷。使然。高年亦有患此。非精氣之病。不可混治。  
又按戴元禮論赤濁云。精者血之所化。有濁去太  
多。精化不及。赤未變白。故成赤濁。此虛之甚也。何  
以知之。有人天癸未至。強力好色。所泄半精半血。



若溺不赤。無他熱證。縱見赤濁。不可以赤爲熱。祇宜以治白濁法治之。觀此則以赤帶爲熱者謬矣。雄按帶下。女子生而卽有。津津常潤。本非病也。故扁鵲自稱帶下醫。卽今所謂女科是矣。金匱亦以三十六病隸之帶下。但過多則爲病。溼熱下注者爲實。精液不守者爲虛。苟體強氣旺之人。雖多亦不爲害。惟乾燥則病甚。蓋營津枯涸。卽是虛勞。凡汎愆而帶盛者。內熱逼液而不及化赤也。併帶而枯燥全無者。則爲乾血勞之候矣。彙而觀之。精也。液也。痰也。溼也。血也。皆可由任脈下行而爲帶。然



有虛寒有虛熱有實熱三者之分。治遺精亦然。而虛寒證較少。故天士治帶必以黃檗為佐也。

妙香散 治脈小食少或大便不實者。

龍骨 一兩

益智仁 一兩

人參 一兩

白茯苓

錢五 遠志 五錢

去心

茯神 五錢

去木

硃砂 二錢

五分

炙

甘草 錢半

為末每服酌用數錢

地黃飲子去桂附

腎陰不足肝陽內風鼓動而滑

精其脈弦大者宜之。葉云天地溫和風濤自息。又云

坎中陽微下焦失納。又云肝為剛臟不宜剛藥祇宜

溫柔養之。



水製熟地

八錢

川石斛

一錢五分

石菖蒲

一錢

遠

志肉

炒一錢

巴戟肉

一錢

乾淡蓰蓉

一錢

麥冬

一錢五分

茯苓

半一錢

五味子

萸肉

末二味酸藥可去

補腎陰清肝陽方

王宇泰云腎為陰主藏精肝為

陽主疏泄故腎之陰虛則精不藏肝之陽強則氣不

固按此方以清芬之品清肝不以苦寒之藥傷氣

藕節

一觔

青松葉

一觔

側柏葉

一觔

生地

八兩

玉竹

八兩

天冬

八兩

女貞子

四兩

旱蓮草

四兩煎膏

八味丸 戴元禮云有赤白濁人服元免丹不效服

附子八味丸即愈者不可不知按此即坎中陽微下

女斗母要

卷二

八



女科要略卷一  
焦失納之意。屢用有效。

雄按陰虛而兼溼火者。宜六味丸。甚者加黃檗丸。  
妙。

松硫丸。此是方外之方。治赤白濁。赤白帶。日久不  
愈。無熱證者。其效如神。

松香。硫黃。鐵銚。內鎔化。將醋頻頻酒上。俟藥  
如飴。移銚置冷處。用冷水濡手。丸如豆大。必須人  
眾方可。否則凝硬難丸。每服壹錢。

雄按此方。究宜慎用。

固精丸。選註云。陽虛則無氣以制其精。故寐則陽



而精道不禁。隨觸隨泄。不必夢而遺也。必須提陽固氣。乃克有濟。

鹿茸

具一

鹿角霜

分兩

韭子

一兩

五味子

錢五

淡乾菝葐

兩一

茯苓

錢五

熟附子

錢五

巴

戟肉

錢五

龍骨

錢五

赤石脂

五錢

酒糊丸

溫柔瀆法

葉氏治白淫

白龍骨

桑螵蛸

湖蓮

芡實

茯苓

金

櫻子

覆盆子

遠志肉

茯神

蜜丸

赤水元珠端本丸

治脈大體肥。大便晨泄不爽。淫

熱遺精極驗。

葉云。淫熱之病。面色赤亮可證。

女科綱要

七



苦參二兩

黃檗二兩

牡蠣一兩

蛤粉一兩

葛根

一兩 青蒿一兩

白螺螄殼一兩

神麴和丸

本事方清心丸

戴元禮云有經絡熱而滑精者此

方最妙

大智禪師云腰脊熱而遺者皆熱遺也

黃檗

冰片

鹽湯爲丸

杰按然亦有陰虧之極致腿足腰脊肝腎部位作

熱而遺者又宜填陰固濟以歛虛陽非可妄投清

火宜詳辨脈證

導赤散

李瀕湖云一壯年男子夢遺白濁少腹有

氣上衝

每日腰熱卯作酉涼腰熱作則手足冷前陰



無氣腰熱退則前陰氣動手足溫又旦多下氣暮多噫氣時振逾旬必遺脈弦滑而大偶投瀉藥則一夜二遺遂用此方大劑煎服遺濁皆止

生地 木通 甘草稍

雄按任脈虛而帶下不攝者往往滋補雖投而不能愈余以海螵蛸一味爲粉廣魚鱉煮爛杵丸綠豆大淡菜湯下久服無不收功眞妙法也

求子

素問女子二七而天癸至任脈通太衝脈盛月事以時下故有子七七而任脈虛太衝脈衰少天癸竭地



有奔<sub>經</sub>虛  
及奔<sub>經</sub>不<sub>虛</sub>  
而不受胎者

道不通故形壞而無子

沈按此求子全賴氣血充足虛衰卽無子故薛立齋云至要處在審男女尺脈若右尺脈細或虛大無力用八味丸左尺洪大按之無力用六味丸兩尺俱微細或浮大用十補丸此遵內經而察脈用方可謂善矣然此特言其本軀虛而不受胎者也若本體不虛而不受胎者必有他病繆仲淳主風冷乘襲子宮朱丹溪主衝任伏熱張子和主胸中實痰丹溪於肥盛婦人主脂膜塞胞陳良甫于二三十年全不產育者胞中必有積血主以盪胞湯



諸賢所論不同。要皆理之所有。宜察脈辨證施治之。  
湯胞湯在千金爲婦人求于第一方。孫真人鄭重

湯胞湯

朴硝 丹皮 當歸 大黃 桃仁 生用各三銖

厚朴 桔梗 人參 赤芍 茯苓 桂心

甘草 牛膝 橘皮 各二銖 附子 六銖 蠱虫

水蛭 各十枚

右十七味。㕮咀。以清酒五升。水五升。合煮取三升。分四服。日三夜一。每服相去三時。更服如前。



覆被取微汗。天寒汗不出。着火籠之。必下膿血。  
務須斟酌下盡二三服。卽止。如大悶不堪。可食  
酢飯冷漿一口。卽止。然恐去惡不盡。忍之尤妙。  
雄按子不可以強求也。求子之心愈切。而得子愈  
難。天地無心而成化。乃不期然而然之事。非可以  
智力爲者。惟有病而礙於孕育之人。始可用藥以  
治病。凡無病之人。切勿妄藥以求子。弄巧反拙。豈  
徒無益而已耶。縱使有效。而藥性皆偏。其于稟之  
非天札。卽頑悖。余歷驗不爽。  
又按盪胞湯。雖有深意。其藥太峻。未可輕用。惟保



胎神佑九善舒氣鬱緩消積血不但爲保胎之良藥亦是調經易孕之仙丹每日七丸頻服甚效余歷用有驗最爲穩妙

又按世有愚夫愚婦一無所知而敏于生育者此方靈臯所謂此事但宜有人欲而不可有天理也觀于此則一切求子之法皆不足憑况體氣不齊豈容概論有終身不受孕者有畢世僅一產者有一產之後踰十餘年而再妊者有按年而妊者有婉甫彌月而卽妊者有每妊必駢胎者且有一產三胎或四胎者駢胎之胞有合有分其產也有接



踵而下者有踰日而下者甚有踰一旬半月而下者。諺云十箇孩兒十樣生。是以古人有甯醫十男子。莫醫一婦人之說。因婦人有胎產之千態萬狀。不可以常理測也。世之習婦科者。不可不究心焉。又按古人五種不男曰螺紋鼓角脈。而人多誤解。余謂螺乃騾字之譌。騾形之人。交骨如環。不能開坼。如受孕。必以產厄亡紋。則陰竅屈曲如螺紋之盤旋。礙于交合。俗謂之實女是也。後人不知騾形之異。而改爲螺。遂以紋之似螺者。又混于鼓鼓者。陰戶有皮輓如鼓。僅有小竅通溺而已。設幼時以



鉛作鋌。逐日絰之久。則自開。尚可以人力爲也。身則陰中有物。興至亦有能舉者。名曰二陰人。俗云雌雄人是也。脈則終身不行經者。理難孕育。然暗經亦可受胎。錢國賓云。蘭谿孫茂匠之妻。自來無經。而生四子一女。故五種之中。惟三者非人力所能治。而紋角二種。併不可交也。特考定之。以正相傳之譌。螺形之女。初生時穩婆技精者。捫之卽知其可男可女之身名。人病者亦角類也。

受胎總論

李東璧曰。易云。男女媾精。萬物化生。乾道成男。坤道成女。褚澄言。血先至裏精。則生男。精先至裏血。則生



女。陰陽均至。非男非女之身。精血散分。駢胎品胎之  
兆。道藏言月水亡後一三五日成男。二四六日成女。  
東垣言血海始淨一二日成男。三四五成女。聖濟言  
因氣而左動。陽資之則成男。因氣而右動。陰資之則  
成女。丹溪乃非褚氏而是東垣。主聖濟左右之說立  
論。歸于子宮左右之系。可謂悉矣。竊謂褚氏未可非。  
東垣亦未盡是也。蓋褚氏以氣血之先後言。道藏以  
日數之奇偶言。東垣以女血之盈虧言。聖濟丹溪以  
子宮之左右言。各執一見。會而通之。理自得矣。蓋獨  
男獨女。可以日數論。駢胎品胎。亦可以日數論乎。史



載一產三子四子有半男半女。或男多女少。或男少女多。則一三五日爲男。二四六日爲女之說。豈其然哉。褚氏聖濟丹溪主精血子宮左右之論。爲有見而道藏東垣日數之論。爲可疑矣。叔和脈經以脈之左右浮沉辨猥生之男女。高陽脈訣以脈之縱橫逆順別駢品之胎形。恐臆度之見。而非確論也。

雄按閱微草堂筆記云。夫胎者。兩精相搏。翕合而成者也。媾合之際。其情旣洽。其精乃至。陽精至而陰精不至。陰精至而陽精不至。皆不能成。皆至矣。時有先後。則先至者氣散不攝。亦不能成。不先不



後兩精並至。陽先衝而陰包之則成男。陰先衝而  
陽包之則成女。此化生自然之妙。非人力所能爲。  
故有一合卽成者。有千百合而終不成者。愚夫婦  
所知能。聖人有所不知能。此之謂矣。端恪後人沈  
君辛甫云。胎脈辨別處。誠醫者所當知。若受妊之  
始。曷以得男。何緣得女。生化之機。初無一定。諸家  
議論雖歧。無關損益。置之可也。

辨胎

素問婦人足少陰脈動甚者。妊子也。

沈按足少陰腎脈也。動者如豆。厥厥動搖也。王太



僕作手少陰。手少陰脈應在掌後銳骨之後陷者中。直對小指。非太淵脈也。必有所據。全元起作足少陰。候在尺中。經云尺裡以候腹中。胎在腹中。當應在尺。此爲近理。

又曰。陰搏陽別。謂之有子。

沈按王注云。陰尺中也。搏謂搏觸于手也。尺脈搏擊與寸脈迥別。則有孕之兆也。

又曰。何以知懷子之且生也。曰。身有病而無邪脈也。難經曰。女子以腎系胞。三部脈浮沉正等。按之不絕者。有姙也。



沈按叔和曰婦人三部脈浮沉正等。以手按之不絕者。孕子也。妊娠初時寸微。呼吸五至。三月而尺數也。脈滑疾。重以手按之散者。胎已三月也。脈重手按之不散。但疾不滑者。五月也。此即陰搏陽別之義。言尺脈滑數。寸脈微小。尺與寸脈別者。孕子也。

8 辨男女胎

王叔和曰。妊娠四月。其脈左疾爲男。右疾爲女。俱疾爲生二子。又曰。左尺偏大爲男。右尺偏大爲女。左右俱大產二子。大者如實狀。即陰搏之意。尺脈實大。



與寸脈迴別。但分男左女右也。

又曰

左脈沉實爲

男。右脈浮大爲女。

婁全善曰。按丹溪云。男受胎在左子宮。女受胎在右子宮。推之于脈。其義亦然。如胎在左。則氣血護胎必盛于左。故脈左疾爲男。左大爲男也。胎在右。則氣血護胎必盛于右。故脈右疾爲女。右大爲女也。亦猶經文陰搏陽別。謂之有子。言胎必在身半之下。氣血護胎必盛于下。故陰尺鼓搏。與陽寸迴別也。

千金云。令妊婦面南行。從背後呼之。左迴首者是男。右迴首者是女。又女腹如箕。以女胎背母足膝抵腹。



下大上小。故如箕。男腹如釜。男胎向母。背脊抵腹。其形正圓。故如釜也。

沈按內經。妊娠脈數條。惟陰搏陽別。尤爲妙諦。素問診法。上以候上。下以候下。氣血聚于上。則寸脈盛。氣血聚于下。則尺脈盛。其勢然也。試之瘡瘍。無不驗者。况胎在腹中。氣血大聚。豈反無徵驗之理。胎系於腎。在身半以下。故見于尺部。但人脈體不同。有本大者。有本小者。卽懷妊時。有見動脈者。有不見動脈者。然尺中或疾或數。總與寸脈迥然有別。細審自得。卽左右男女亦然。受胎時偏左成男。



氣血聚于左則左重故呼之則左顧便脈必形于左尺受胎時偏右成女氣血聚於右則右重呼之則右顧便脈必形于右尺此一定之理也至若丹溪男受胎於左子宮女受胎于右子宮此是語病猶言偏于子宮之左偏于子宮之右耳原非有二子宮也惟左男右女指醫人之左右手言恐未必然

雄按諸家之論皆有至理而皆有驗有不驗余自髫年即專究於此三十年來見聞多矣有甫受孕而脈即顯呈于指下者有半月一月後而見于脈



者有二三月而見於脈者。有始見孕脈而五六月  
之後反不見孕脈者。有始終不見于脈者。有受孕  
後反見絃澀細數之象者。甚有兩脈反沉伏難尋  
者。古人所論原是各抒心得。奈死法不可以限生  
人。紙上談兵。未嘗閱歷者。何足以語此。惟今春與  
楊素園大令談之。極蒙折服。殆深嘗此中甘苦也。  
憶辛丑秋診周光遠令正之脈。右寸關忽見絃大  
滑疾上溢魚際之象。平昔之脈未嘗見此。頗爲臆  
然。及詢起居。諸無所苦。惟汛愆半月耳。余曰。妊也。  
併可必其爲男。繼而其父孫際初聞之。診乃女脈。



曰妊則或然。恐爲女孕。余曰肺象乎天。今右寸脈最絃滑。且見上溢之象。豈非本乎天者親上耶。孫曰此雖君之創解。然極有理。究不知瓜紅何似耳。迨壬寅夏果舉一男。聊附一端。以爲鑿鑿談脈者鑑。

妊婦似風

雄按卽子癰證

沈按妊婦病源有三大綱。一曰陰虧。人身精血有限。聚以養胎。陰分必虧。二曰氣滯。腹中增一障礙。升降之氣必滯。三曰痰飲。人身臟腑接壤。腹中遠一物。臟腑之機括爲之不靈。津液聚爲痰飲。



知此三者庶不爲邪說所惑。妊婦卒倒不語。或口  
眼歪斜。或手足瘳癱。皆名中風。或腰背反張。時昏  
時醒。名爲風痙。又名子癰。古來皆作風治。不知卒  
倒不語。病名爲厥。陰虛失納。孤陽逆上之謂。口眼  
歪斜。手足瘳癱。或因痰滯經絡。或因陰虧不吸。肝  
陽內風暴動。至若腰背反張一證。臨危必見。戴眼  
其故何歟。蓋足膀胱經。太陽之脈。起於目內眥。上  
額交顛。循肩膊內。夾脊抵腰中。足太陽主津液。虛  
則經脈時縮。脈縮故腰背反張。經云。童子高者太  
陽不足。謂太陽之津液不足也。脈縮急則童子高。



甚則戴眼治此當用地黃麥冬等藥滋養津液爲  
主胎前病陽虛者絕少慎勿用小續命湯  
雄按陰虛氣滯二者昔人曾已言之痰飲一端可  
謂發前人之未發因而悟及產後譫妄等證誠沈  
氏獨得之祕反覆申明有裨後學之功不亦多乎  
沈按錢鵠雲正室飲食起居無恙一夜連厥數十  
次發則目上竄形如尸次日又厥數十次至晚一  
厥不醒以火炭投醋中近鼻熏之不覺切其脈三  
部俱應不數不遲並無怪象診畢伊父倪福增曰  
可治否余曰可用青鉛一觔化烱傾盆水內撈起



再烱再傾。三次取水煎生地一兩。天冬二錢。細石  
斛三錢。甘草一錢。石菖蒲一錢服。倪畱余就寢書  
室。晨起見倪復治藥。云昨夜服藥後至今止厥六  
次。厥亦甚輕。故照前方再煎與服。服後厥遂不發。  
後生一子。計其時乃受胎初月也。移治中年非受  
胎者亦屢效。

吳門葉氏治一反張發時如跳蟲離席數寸。發過卽  
如平人。用白芍甘草紫石英炒小麥南棗煎服而愈。  
捷徑方載一毒藥攻胎。藥毒衝上。外證牙關緊急。口  
不能言。兩手強直握拳。自汗。身有微熱。與中風相似。



不能言兩手握直握拳自汗身有微熱與中風相似  
但脈浮而軟十死一生醫多不識若作中風治必死  
用白扁豆二兩生去皮爲末新汲水調下卽效  
痰滯經絡宜二陳加膽星竹瀝薑汁

初娠似勞

沈按錢彬安室人內熱咳喘涎痰夜不能臥脈細  
且數呼吸七至邀余診視問及經事答言向來不  
準今過期不至余因隣近素知伊稟怯弱不敢用  
藥就診吳門葉氏云此百日勞不治歸延本邑浦  
善亭療投逍遙散不應更萎蕤湯亦不應曰病本  
無藥可治但不藥必駭病者可與六味湯聊復爾



女科要略卷十一  
爾因取六味丸料二十分之一煎服一劑咳減二劑熱退四劑霍然惟覺腹中有塊日大一日彌月生一女母子俱安越二十餘年女嫁母故後以此法治懷妊欬喘涎痰或內熱或不內熱或脈數或脈不數五月以內者俱效五月以外者有效有不效

雄按亦有勞損似娠者蓋凡事皆有兩面也

喘

丹溪云因火動胎逆上作喘急者用條芩香附爲末水調服



呂滄洲曰有婦胎死腹中病喘不得臥醫以風藥治肺診其脈氣口盛人迎一倍左關弦動而疾兩尺俱短而離經因曰病蓋得之毒藥動血以致胎死不下奔迫而上冲非外感也大劑芎歸湯加催生藥服之下死胎其夫曰病妾有懷室人見嫉故藥去之眾所不知也

外感作喘仍照男子治故不錄他病倣此

王海藏醫壘元戎曰胎前病唯當順氣若外感四氣內傷七情以成他病治法與男子同當於各證類中求之惟動胎之藥切不可犯



惡阻

金匱曰婦人得平脈陰脈小弱其人渴不能食無寒  
熱名妊娠於法六十日當有此證設有醫者治逆卻  
一月加吐下者則絕之

沈按婁全善曰惡阻謂嘔吐惡心頭眩惡食擇食  
是也絕之者謂絕止醫藥候其自安也子嘗治一  
二妊婦嘔吐愈治愈逆因思絕之之旨停藥月餘  
自安

朱丹溪曰有妊二月嘔吐眩暈脈之左弦而弱此惡  
阻因怒氣所激肝氣傷又挾胎氣上逆以茯苓半夏



湯下抑青丸。

千金半夏茯苓湯。治妊娠阻病。心中憤悶。空煩吐逆。惡聞食氣。頭眩體重。四肢百節疼煩沉重。多臥少起。惡寒汗出。疲極黃瘦。

半夏

生薑

各三十銖

乾地黄

茯苓

各十八銖

橘

皮

旋覆花

細辛

人參

芍藥

芎藭

桔梗

甘草

各十銖

右十二味。㕮咀。以水一斗。煮取三升。分三服。若

病阻積月日不得治。及服藥冷熱失候。病變客

熱煩渴口生瘡者。去橘皮。細辛。加麻胡。知母。各



十二銖。若變冷下利者。去乾地黄。入桂心十二銖。若食少。胃中虛生熱。大便閉塞。小便赤少者。宜加大黃十八銖。去地黄。加黃芩六銖。餘依方服一劑。得下後。消息看氣力。冷熱增損。方更服一劑。湯便急。使茯苓丸。令能食。便強健也。忌生冷醋滑油膩。

千金茯苓圓

服前

兩劑後服此即效

茯苓

人參

桂心

熬

乾薑

半夏

橘皮

各一兩

白朮

葛根

甘草

枳實

各二兩

右十

味蜜丸。梧子大。飲服二十九。漸加至三十九。日



三

杰按胎后不用乾姜半夏橘皮白朮葛根只用五  
物又云妊娠忌桂故熬  
雄按胎前產後非確有  
虛寒脈證者皆勿妄投熱  
劑暑月尤宜慎之

又方

青竹筍

橘皮

各十  
八銖

茯苓

生薑

各一  
兩

半夏

三十  
銖

右五味水六升煮取二升半分三服

千金橘皮湯治妊娠嘔吐不下食



橘皮 竹茹 人參 白朮 各十八銖 生薑 一兩

厚朴 十二銖 右六味 水七升 煮取二升半 分三

服

沈按費姓婦懷妊三月嘔吐飲食服橘皮竹茹黃

芩等藥不效松郡車渭津用二陳湯加旋覆花薑

皮水煎冲生地汁一杯一劑吐止四劑全愈一醫

笑曰古方生地半夏同用甚少不知此方即千金

半夏茯苓湯除去細辛桔梗芎藭白芍四味

又按嘔吐不外肝胃兩經病人身臟腑本是接壤

懷妊則腹中增了一物臟腑機括為之不靈水穀



之精微不能上蒸爲氣血凝聚而爲痰飲窒塞胃  
口所以食入作嘔。此是胃病。又婦人既娠則精血  
養胎無以攝納肝陽則肝陽易升肝之經脈夾胃  
肝陽過升則飲食自不能下胃。此是肝病。千金  
夏茯苓湯中用二陳化痰以通胃也。用旋覆高者  
抑之也。用地黃補陰以吸陽也。用人參生津以養  
胃也。其法可謂詳且盡矣。至若細辛亦能散痰桔  
梗亦能理上焦之氣。芎藭亦能宣血中之滯。未免  
升提。白芍雖能平肝斂陰。仲景法胸滿者去之。故  
事氏皆不用。斟酌盡善。西劑獲安有以也。



雄按發明盡致。精義入神。

沈按蔡姓婦惡阻。水藥俱吐。松郡醫用抑青丸立效。黃連一味爲末。粥糊丸。麻子大。每服二三十丸。又按肝陽上升。補陰吸陽。原屬治本正理。至肝陽亢甚。滴水吐出。卽有滋陰湯藥。亦無所用。不得不。用黃連之苦寒。先折其太甚。得水飲通。然後以滋陰藥調之。以收全效。

雄按左金丸亦妙。

沈按沈姓婦惡阻。水藥不咽。卽吐。醫藥雜投不應。身體骨立。精神困倦。自料必死。醫亦束手。一老婦



當愈後

云急停藥。入十日當愈。後果如其言。停藥者。卽金匱絕之之義也。至入十日當愈一語。豈金匱六十日當有此證之誤耶。不然。何此言之驗也。又朱宗承正室。甲戌秋。體倦吐食。診之略見動脈。詢得停經兩月。惡阻證也。述前治法有效。有不效。如或不效。卽當停藥。錄半夏茯苓湯方與之不效。連更數醫。越二旬復邀余診。前之動脈不見。但覺細軟。嘔惡日夜不止。且吐虺兩條。余曰。惡阻無礙。吐虺是重候。姑安其虺。以觀動靜。用烏梅丸早晚各二十九。四日虺止。嘔亦不作。此治惡阻之變局。



也故誌之

妊婦煩名子煩

丹溪云煩因胎元壅鬱熱氣所致

沈按子煩病因曰痰曰火曰陰虧因痰者胸中必

滿仲景云心中滿而煩宜瓜蒂散此是吐痰法妊

婦禁吐宜二陳湯加黃芩竹茹旋覆花陰虧火甚

者仲景黃連阿膠最妙

附醫方集解汪詡菴有竹葉湯一方治妊娠心驚

膽怯終日煩悶名子煩因受胎四五月相火用事

或盛夏君火大行俱能乘肺以致煩躁胎動不安



亦有停痰積飲滯于膈膈以致煩躁者

麥冬

錢半

茯苓

黃芩

錢一

人參

五分

淡竹葉

十片

竹葉清煩黃芩

消熱麥冬涼肺心火乘肺故

煩出於肺茯苓安心人參補虛妊娠心煩固多虛

也如相火盛者單知母丸君火盛者單黃連丸

神不安者硃砂安神丸切不可作虛煩用梔豉等

藥治之一方茯苓爲末無人參有防風一方有防

風知母無人參有麥冬者加竹瀝

子懸

嚴氏紫蘇散許叔微云治懷胎近上脹滿疼痛謂之



子懸 陳良甫曰妊至四五月君相二火養胎熱氣

逆上胎湊心胸腹滿或阿名日子懸用此加黃芩山

梔之類一方無川芎名七寶散許叔微云六七月子

懸者用之數數有驗不

紫蘇一兩 腹皮 人參 川芎 橘皮 白芍

當歸三分 甘草一分 剉分三服水一盞生薑四

片葱白煎去渣服

杰按去川芎應避升提之故

汪認菴曰治胎氣不和湊上胸腹腹滿頭疼心腹腰

脇皆痛名子懸因下集氣實相火旺盛舉胎而上上



通心胸也。每服止用蘇葉一錢，當歸七分，腹皮以下皆五分，甘草二分，無蔥白。心腹痛者，加木香、延胡。陳來章曰：芎歸芍藥以和其血，蘇橘大腹以順其氣，氣順血和則胎安矣。既利其氣，復以人參、甘草養其氣者，順則順其邪逆之氣，養則養其沖和之氣也。

杰按：延胡動血，恐未可用。

趙養葵有命門虛寒，胎上湊心，就煖一說。

沈按：此是百中僅一，非實見。虛寒脈證，熱藥不可嘗試。

又郁姓婦懷妊九月，偶因勞動，遂覺腹痛，胎漸升。



至胸中氣塞不通。忽然狂叫咬人。數人扶將不住。  
病名子上撞心。卽子懸之最重者。用旋覆代赭湯  
去參棗。連灌兩劑。胎墮得生。又一婦證亦如之。服  
前藥胎墮而死。

又陸檢修正室子。止撞心。江穩婆教磨代赭汁服。  
遂產兩子。一子在上橫於心下。一子撞着上子。故  
經一晝夜。不至撞心。得不死。產下遂安。

葱白湯治胎上逼心煩悶。又治胎動困篤。本草云。葱  
白通陽安胎。婁全善曰。此方神效。脈浮滑者宜之。葱  
白二七莖。濃煮汁飲之。胎未死卽安。已死卽出。未效



再記

陳良甫曰。治一婦孕七箇月遠歸。忽然胎上衝作痛。坐臥不安。兩醫治之無效。遂云胎已死矣。用芎藭子研爛和麝香貼臍中。以下之。命在呼吸。召陳診視。兩尺脈絕。他脈和平。陳問二醫作何證治之。答云死胎。陳問何以知之。曰兩尺沉絕。以此知之。陳曰此說出何書。二醫無答。陳曰此子懸也。若是胎死。卻有辨處。面赤舌青。子死母活。面青舌赤。吐沫。母死子活。唇舌俱青。子母俱死。今面不赤。舌不青。其子未死。是胎上通心。宜以紫蘇飲連進。至十服而胎近下矣。



李氏日子懸證火盛極一時心氣悶絕而死紫蘇飲連進可救。若兩尺脈絕者有誤服動胎藥子死腹中則憎寒手指脣爪俱青全以舌爲證驗芎歸湯救之。

雄按戊申秋荆人妊八月而患欬嗽礙眠鼻衄如射面浮指腫諸藥不應諦思其故素屬陰虛內火自盛胎因火動上湊心胸肺受其衝欬逆乃作是不必治其嗽仍當以子懸治之因以七寶散去參芍生薑爲其胸滿而內熱也加生石膏以清陽明之火熟地黃以攝根蒂之陰投匕即安今年冬仲



亦以八月之娠而悲哀勞  
嗽痰腕脹便溏苔黃口渴  
予蠲飲六神湯去膽星  
茯苓加枳實蘇葉大腹皮以理氣開鬱黃芩厄子  
竹筴以清熱安胎一劑知二劑已凡子懸證因于  
痰滯者余每用此法無不應如桴鼓

### 妊娠腫脹

沈按妊婦腹過脹滿或一身及手足面目俱浮病  
名子滿或名子腫或名子氣或名胎水或名琉璃  
胎但兩腳腫者或名皺腳或名脆腳名色雖多不  
外有形之水病與無形之氣病而已何則胎礙臟



水。或脾不能散精行肺。或肺不能水精四布。此有形之水病也。又腹中增一物。則大氣升降之道窒塞。此無形之氣病也。病在有形之水。其證必皮薄色白而亮。病在無形之氣。其證必皮厚色不變。說見內經脹論。細玩自明。更有痰滯一證。痰雖水類。然凝聚質厚。不能遍及皮膚。惟壅滯氣道。使氣不宣通。亦能作腫。其皮色亦不變。故用理氣藥不應加化痰之品。自然獲效。

徐按靈樞水脹論曰。水始起。目窠上微腫。如新臥。



起之狀其頸脈動時欬陰股閒寒足脛腫腹乃大  
其水已成矣以手按其腹隨手而起如裹水之狀  
此其候也膚脹者寒氣客于皮膚之間蹙蹙然不  
堅腹大身盡腫皮厚按其腹窅而不起腹色不變  
此其候也愚按於膚脹言皮厚色不變則水脹之  
皮薄色變可知矣存叅

千金鯉魚湯治妊娠腹脹滿或渾身浮腫小便赤澀  
沈按此治有形之水也以腹脹滿爲主身腫溺澀  
上加一或字乃或有或無之詞不必悉具

陳良甫曰胎孕至五六箇月腹大異常此由胞中畜



水名曰胎水不早治恐胎死或生子手足軟短宜干  
金鯉魚湯蓋鯉魚歸腎又是活動之藥臣以苓朮薑  
橘直達胞中去水又恐水去胎虛佐以歸芍使胎得  
養真神方也

當歸

白芍

各二錢

茯苓

一錢五分

白朮

三錢

橘

紅

五分

鯉魚一尾去鱗腸作一服白水煮熟去

魚用汁一盞半入生薑三片煎一盞空心服胎

水卽下如腹悶未盡除再合一服

金匱葵子茯苓湯治妊娠有水氣身重小便不利酒  
漸惡寒起卽頭眩按此滑利之劑亦治有形之水



葵子

一

茯苓

三

為散飲服方寸匕日三服

小便利則愈

天仙藤散治妊娠自三月成胎之後兩足目脚面漸腫至腿膝行步艱難喘悶妨食狀似水氣甚至足指閒出黃水者謂之子氣此元豐中淮南名醫陳景初製也本名香附散後李伯時更名天仙藤散按此理氣方也脚面漸腫至腿膝併足指閒黃水出是水與氣同有之證不得即謂之氣病必皮厚色不變方是氣病用此方為對證

天仙藤

即青木香  
藤洗略焙

香附

炒

陳皮

甘草



烏藥

木香

分等

劉宋每服五錢加生薑三片

紫蘇五葉水煎日三服腫消止藥

齊仲甫曰妊娠八九月見腳腫不必治當易產因胎中水血多不至慘胎故也若初妊卽腫者是水氣過多兒未成體恐胎傷壞

腳腫主男胎宋少主微行徐文伯從見一妊婦不能行少主脈之曰此女形也文伯診之曰此男胎也在左則胎色黑少主怒欲破之文伯惻然曰臣請針之補合谷瀉三陰交應手而下男形而色黑

薛立齋案云

妊婦腹脹小便不利吐逆諸醫雜進



溫胃寬氣等藥服之反吐轉加脹滿湊心驗之胎死已久服下死胎藥不能通因得鯉魚湯其論曰妊婦通身腫滿或心胸急脹名曰胎水遂看妊婦胸肚不分急以鯉魚湯三五服大小便皆下惡水腫消脹去方得分娩死胎此證蓋因懷妊腹大不以爲怪竟至傷胎可不慎哉

### 妊娠經來

王叔和曰婦人月經下但少師脈之反言有娠其後審然其脈何類曰寸口脈陰陽俱平營衛調和寸口陽俱平自然重按之以候陰分營衛調和也按之則滑浮之則輕重按之有餘之象



浮取之以候陽分則輕是不足陽明少陰各如經法  
之象竊謂此即陰搏陽別之義  
衝隸陽明主血任隸少陰主精各如身反洒淅不欲  
經法精血無損是有妊而不墮之象  
食頭痛心亂嘔吐而無邪脈妊子也  
呼之則微吸  
之不驚陽多氣溢陰滑氣盛滑則多實六經養成所  
以月見呼出之氣微數吸入之氣舒徐不驚是陽氣  
內盛所以月見經來六經多溢於外合陽氣不足於內陰脈滑則陰血  
養成句無解尚須查詳陰見陽精汁凝胞散散者  
損胎若陰分虛而陽精乘之胞中必散方是胎墮設  
復陽盛雙妊二胎今陽不足故合激經也然胞中若散脈必散而不滑今脈滑無虞也  
今氣不足而血有餘設陰陽俱盛必雙胎  
非雙胎乃激經也

產乳集云妊婦月信不絕而胎不損問產科熊宗古



答云此婦血盛氣衰其人必肥既妊後月信常來而胎不動若便以漏胎治之則胎必墮若不作漏胎治則胎未必墮。宗古之言誠爲有見。然亦有未必因血盛者。榮經有風則經血喜動以風勝故也。則所下者非養胎之血。若作漏胎治投以滋補是實實也。胎豈有不墮。若知是風。當以一味風藥投之。經信可止。卽不服藥。胎亦無恙。然亦有胎本不固。因房室不節。先漏而後墮胎者。須作漏胎治。又不可不審也。

沈按妊娠經來與漏胎不同。經來是按期而至。來亦必少。其人血盛氣衰。體必肥壯。漏胎或因邪風。



所迫或因房室不節血來未必按期體亦不必肥  
壯且漏胎之因不盡風邪房室更有血熱肝火諸  
證不可不察脈辨證風入脈中其脈乍大乍小有  
時隴起所云一味治風藥是舉卿古拜散即華陀  
荆芥畧炒爲末每服三錢黑豆滓酒調服血熱證必五心煩熱治以黃  
芩阿膠涼血之藥肝火內動脈必弦數併見氣脹  
腹痛治以加味道遙散見崩房勞證脈必虛宜人  
參或虛而帶數宜六味湯

天民曰或問妊婦有按月行經而胎自長者有三  
種月間其血太下而胎不墮者或及期而分娩或



逾月而始生其理何歟曰按月行經而胎日長者名曰盛胎其婦氣血充盈養胎之外其血有餘故也有數月之胎而血大下謂之漏胎因事觸胎動其衝脈故血下而不傷子宮也然孕中失血胎雖不墮氣血亦虧多致踰月不產曾見有十二三月十七八月或二十四五箇月生者往往有之俱是氣血不足胚胎難長故耳凡十月之後未產者當大補氣血以培養之庶無分娩之患也

李氏曰胎漏自人門下血尿血自尿門下血

蕭賡之云胎漏下血頻出無時尿血溺時方下不溺



則不下

沈按尿血小劑飲子妙。

雄按懷孕屢漏之後。氣血耗傷。有遲至三四月而生者。若妊娠帶下多。主生女。亦大不然也。吳鵬香大令五令媳。素患帶。婚後帶益盛。繼漸汎愆。醫皆以爲帶所致也。久投溫澀無效。余診之脈甚滑數。以懷麟斷。清其胎火而愈。及期果誕一子。

子淋 轉胞

杰按此淋字與俗所云赤淋淋字不同。彼指赤帶言。係女精。此係指小便言也。



妊婦淋曰子淋小便不出曰轉胞。子淋小便頻數點  
滴而痛。轉胞頻數出少不痛。淋屬肝經。陰虧火熾。轉  
胞因膀胱被胎壓住。膀胱止有一口。未溺時其口向  
上。口端橫一管。上半管卽名下焦。下半管卽是溺孔。  
未溺時膀胱之底下垂如甌狀。其口在上與下焦直  
對。溺從下焦滲入。故曰下焦者別迴腸而滲入膀胱  
焉。欲溺時大氣舉膀胱之底如傾甌狀。其口向下從  
溺孔注出。故曰氣化則能出矣。轉胞一證。因胎大壓  
住膀胱。或因氣虛不能舉膀胱之底。氣虛者補氣。胎  
壓者托胎。若浪投通利。無益於病。反傷正氣。



杰按汪訥菴又謂胞系轉戾臍下急痛爲轉胞。洩或數或閉二說小異。

子淋方

生地 阿膠 黃芩 黑山梔 木通 甘草

水煎服

丹溪治一妊婦小便不通。令一婦用香油塗手自產門入托起其胎。溺出如注。卽用人參黃耆升麻大劑煮服。又治一婦轉胞。用參歸煎服。探吐得愈。

沈按訥菴載其方名參朮飲。蓋由歸熟地黃芩薤芍藥人參白朮留白陳皮半夏。甘草加薑煎空。



心服丹溪論曰。窘胞之病。婦之稟受弱者。憂悶多者。性驟急者。食味厚者。多有之。古方用滑藥鮮效。因思胞不自轉。爲胎被壓。胎若舉起。胞必自疏。水道自通矣。近吳宅寵人患此。脈似澹。重則弦。予曰。此得之憂患。澹爲血少。氣多。弦爲有飲。血少則胎弱。不能舉。氣多有飲。中焦不清而溢。則胎避而就下。乃以上藥與飲。隨以指探。喉中吐出藥汁。候氣定。又與之而安。此恐偶中。後治數人。皆效。

仲景云。婦人本肥盛。今反羸瘦。胞系了戾。但利小便則愈。宜服腎氣丸。以中有茯苓故也。地黃爲君。功在



補胞。又法將孕婦倒豎胎轉而小便自通矣。

沈按汪昂採本事安榮散治子淋心煩悶亂云子淋膀胱小腸虛熱也。虛則不能制水。熱則不能通利。故淋心與小腸相表裡故煩悶。方用人參甘草之甘以補虛。木通燈草之滲滑。石之滑以通淋。悶肺燥則天氣不降而麥冬能清之。腎燥則地氣不升而細辛能潤之。血燥則滿瀆不濡而當歸能滋之也。亦有因房勞內傷胞門衝任虛者宜八珍湯或腎氣丸。

下利



本草綱目妊娠下利用鷄卵一箇烏骨者尤妙開孔  
去白留黃入漂鉛丹五錢攪以泥裹煨透研末每服  
二錢米飲下一服效是男兩服效是女 曾試過有  
效有不效然利卽不止而腹痛必緩

辟立齋云一妊婦久利用消導理氣之劑腹內重墜  
胎氣不安又用阿膠艾葉之類不應用補中益氣湯  
而安繼用六君子全愈

又云妊娠利下黃水是脾土虧損真氣下陷也宜補  
中湯

雄按此下利乃泄瀉自利之證若滯下赤白之痢



證仍當別治。

妊娠腹痛

金匱曰婦人懷妊腹中疝痛當歸芍藥散主之。

當歸

三兩

芍藥

一兩

茯苓

四兩

白朮

四兩

澤瀉

半

芎藭

三兩

右六味為散取方寸匕酒和日三服。

又曰妊娠腹中痛為胞阻膠艾湯主之。

芎藭

阿膠

甘草

各二兩

艾葉

當歸

各三兩

芍藥

四兩

乾地黄

六兩

右七味水五升清酒二升合煮取三升去渣內



膠合消盡溫服一升日三

太按嚴氏用治胎動經漏腰痛腹滿搶心短氣加黃耆認菴亦謂妊娠下血腹痛爲胞阻主此湯

又按又方阿膠一觔蛤粉炒艾葉數莖亦名膠艾湯治胎動不安腰腹疼痛或胎上搶心去血腹痛又曰懷妊六七月脈弦發熱其胎愈脹腹痛惡寒者小腹如扇所以然者子藏開故也當以附子湯溫其藏

附子 人參 白朮 芍藥 茯苓

大全云妊娠四五月後每常胸腹間氣刺滿痛或腸



嗚以致嘔逆減食。此由忿怒憂思過度。飲食失節所致。蔡元度寵人有子。夫人怒欲逐之。遂成此病。醫官王師復處以木香散。我尤木香甘草丁香鹽湯下。三服而愈。

夏墓蕩一婦豐前橋章氏女也。已卯夏章氏來請云。懷孕七箇月。患三瘧利疾。及診病者止云。小便不通。腹痛欲死。小腹時有物壅起。至若利疾。晝夜數十起。所下無多。仍是糞水。瘧亦寒熱甚。欲予思俱是肝病。蓋肝脈環陰器。抵小腹。肝氣作脹。故小腹痛。弱不利。脹甚則數欲大便。肝病似瘧。故寒熱。



予議泄肝法許其先止腹痛後利小便彼云但得如此卽活不必顧胎子曰川楝子橘核白通草白芍茯苓甘草煎服一劑腹痛止小便利四劑瘧利盡除胎亦不墮以後竟不服藥彌月而產

雄按徐悔堂云秣陵馮學園之內人忠痞痛每發自臍間策策動未幾編行腹中疼不可忍頻年醫治不一其人而持論各異外貼膏藥內服湯丸攻補溫涼備嘗不效病已瀕危謝絕醫藥迨半月後病勢稍減兩月後飲食如常而向之策策動者日覺其長馴至滿腹又疑其鼓也復爲醫治亦不能



愈如是者又三年。忽一日腹痛幾死。旋產一男。母子無恙而腹痛消。計自初病至產蓋已九年餘矣。此等異證。雖不恒見。然爲醫者不可不知也。

妊娠腰痛

大全曰。婦人腎以繫胞。腰痛甚則胎墮。故最爲緊要。若閃挫氣不行者。通氣散腎虛者。青娥不老丸。總以固胎爲主。

通氣散方

良方

破故紙瓦上炒香爲末。先嚼胡桃一

箇爛後以溫酒調服。故紙末三錢空心服。治妊娠

腰痛不可忍。此藥最神。

雄按故紙性熱妨胎。惟閃挫可以暫用。或但服胡桃較安。



薛立齋云腰痛因肝火

小柴胡湯加白朮枳殼

山梔

沈按腰之近脊處屬腎兩旁近季脇者屬肝

妊婦腹內鐘鳴

大全用鼠窟前後土爲細末研麝香酒調下立愈

腹內兒哭

產寶云腹中臍帶上疙瘡兒含口中因妊婦登高舉  
臂脫出兒口以此作聲令妊婦曲腰就地如拾物狀  
仍入兒口卽止又云用空房中鼠穴土同川黃連  
煎汁飲亦效



沈按相傳腹內鐘鳴。卽是兒哭。今人治此撒豆一把在地。令妊婦細細拾完。卽愈。此是妙法。

雄按此讐言也。王清任曰。初結胎無口時。又以何物吮血養生。旣不明白。何不歸而謀諸婦。訪問的確。再下筆。庶不貽笑後人。此說甚精。余嘗謂身中之事。而身外揣測。雖聖人亦不免有未必盡然之處。故拙案論證。但以氣血寒熱言之。固屬弁陋。實不敢以己所未信者欺人也。今春與楊素園大令言及從來藏府之論。殊多可疑。楊侯歎曰。君可謂讀書得閒。不受古人之欺者矣。因出玉田王清任



醫林改錯見贈披閱之下竟將軒岐以來四千餘  
年之案一旦全反毋乃臧聞然此公徵諸目擊非  
託空言且楊侯徧驗諸獸無不脗合然則昔之鑿  
鑿言藏府之形者豈不皆成笑柄哉然泰西人身  
圖說一書流入中國已二百餘年所載藏府與王  
說略同而俞理初未見改錯過信古書于癸巳類  
稿內沿襲舊論謂中外藏府迥殊且云外洋人畢  
九有四枚尤屬杜撰

### 養胎

杰按金匱云懷身七月太陰當養以此見十月養



胎之說其來久矣

徐之才曰妊娠一月名始胎足厥陰肝脈養之三月  
名始膏足少陽膽脈養之三月名始胞手少陰心主  
胞絡脈養之四月始受水精以成血脈手少陽三焦  
脈養之五月始受火精以成氣足太陰脾脈養之六  
月始受金精之氣以成筋足陽明胃脈養之七月始  
受木精之氣以成骨手太陰肺脈養之八月始受土  
精之氣以成膚革手陽明大腸脈養之九月始受石  
精之氣以成毛髮足少陰腎脈養之十月五臟六腑  
皆具俟時而生



然按人鏡經惟手太陽不賜與手少陰心脈一經

不養者以其上爲乳汁下主月水也

雄按此亦道其常耳有每妊不足月而產者有必  
踰期而產者有先後不  
等者亦不爲病也惟產不  
足月而形有未備或產  
母氣不足爲病再有身  
時須預爲調補自然充備  
余鄰家畜一母雞連下  
數卵殼皆軟鄰以爲不祥  
欲殺之余謂此下卵過多  
母氣虛也令以粳米蛇  
牀子飼之數日後下卵  
如常推之子人理無二致  
巢元方曰妊娠受胎之月



多在二四六月者少三日屬心五月屬脾七月屬肺  
皆屬臟腑為陰陰不足故多墮耳如在三月墮者  
後孕至三月勿墮心脈受傷也先須調心五月七  
月墮者亦然一月墮者人不知也一月屬肝怒則  
多墮洗下體裏關亦墮一次既墮肝脈受傷下次仍  
墮今之無子者大半是一月墮者非盡不受胎也故  
凡初交後最宜將息勿復交接以擾子宮勿令勞怒  
勿舉重勿洗浴又多服養肝平氣藥則胎固矣  
丹溪曰陽施陰化胎孕成血氣虛損不足以榮養其  
胎則自墮譬如枝枯則果落藤萎則花墮或勞怒傷



情內火便動亦能動胎正如風撼其樹人折其枝也  
火能消物造化自然病源乃謂風冷傷子臟而墮未  
得病情者也有孕婦至三四月必墮其脈左手大而  
無力重取則澀知血少也止補中氣使血自榮以白  
朮濃煎下黃芩末數寸劑而安因忌胎墮于內熱而  
虛者爲多曰熱曰虛當分輕重蓋孕至三月上屬相  
火所以易墮不然黃芩熱又阿膠何謂安胎妙藥耶  
方約之曰婦人有振則礙脾運化遲而生溼溼生熱  
丹溪用黃芩白朮爲安胎聖藥蓋白朮健脾慘溼條  
芩清熱故也但妊娠賴血養胎方內四物去川芎佐



之爲尤備耳

張飛疇曰古人用條芩安胎惟形瘦血熱營行過疾胎常上逼者相宜若形盛氣衰胎常下墜者非人參舉之不安形實氣盛胎常不運者非香砂耗之不安血虛火旺腹常急痛者非歸芍養之不安體肥痰盛嘔逆眩暈者非二陳治之不安此皆治母氣之偏勝也若有外邪仍宜表  
諸切不可犯

雄按條芩但宜于血熱之體若血虛有火者余以竹茹桑葉絲瓜絡爲君隨證而輔以他藥極有效

蓋三三物皆養血清熱而息內風也物之入聖強莫如



蓋三物皆養血清熱而息內風也。物之堅強莫如竹皮。禮云如竹簞之有筠是也。皮肉之繫點亦莫如竹。故竹雖從而皮肉不相離實爲諸血證之要藥。觀塞舟不漏可知矣。桑葉蠶食之以成絲。絲瓜絡筋膜聯絡質韌子堅具包羅維繫之形。且皆色青入肝。肝虛而胎系不牢者。勝于四物阿膠多矣。惜未有發明之者。

王海藏云安胎之法有二。如母病以致動胎者。但療母則胎自安。若胎有觸動以致母病者。安胎則母自愈。



丹溪云有婦經住或成形未具其胎必墮察其性急多怒色黑氣實此相火太盛不能生氣化胎反食氣傷精故也

又曰有婦經住三月後尺脈或濇或微弱其婦卻無病知是子宮真氣不全故陽不施陰不化精血雖凝終不成形或產血塊或產血泡也惟脈洪盛者不墮胎動不安

血虛火盛其婦必形瘦色黑其胎常上逼者宜條芩阿膠

杰按前正飛說謂形瘦血熱宜條芩血虛火旺

宜歸芍此似將上二條并爲一條思其王



宜歸芍此似將上二條併爲一治想須在胎上逼與腹急痛上分別未知是否存參

氣虛婦體肥白胎常下墜宜人參

杰按體肥白是氣虛證據宜與張說參看又思體肥白者未必皆氣虛必肥白而胎下墜方是形盛氣衰也須辨存參

雄按審屬氣虛欲墮者補中益氣法甚妙

形氣盛胎常不運者宜香砂

痰氣阻滯體肥嘔逆眩暈者宜二陳

怒氣傷肝加味道遙散



毒藥動胎

白扁豆二兩生去皮爲末新汲水下

見厥

逆門須合泰以辨其證

交接動胎

其證多嘔產室百問載綱目方飲竹瀝

一升有驗人參尤妙

築碯著胎

惡露已下疼痛不止口噤欲絕用神妙

佛手散探之若不損則痛止子母俱安若損胎立

便逐下卽芎藭湯治傷胎多神效

胎動下血不絕欲死本草綱目用蜜蜂蠟如鷄子大

煎三五沸投美酒半升服立瘥馮云神效蠟淡而

性瀉入陽明故也



雄按懷妊臨月竝無傷動。血下不止腹無痛  
苦者名海底漏。亟投大劑參耆十不能救其一。二  
此由元氣大虛。衝脈不攝而管脫于下也。

王叔和云胎病不動欲知生死婦人摸之如覆盆者  
男如肘頸參差起者女也。冷者爲死。溫者爲生。

聖濟總錄云胞衣不下急於胎未生子死腹中危  
於胎之末下蓋胞衣未下子與母氣通其呼吸若  
子死腹中胞藏氣寒胎血凝沮氣不升降古方多  
以行血順氣藥及硝石水銀礪砂之類然胎已死  
軀形已冷血凝氣聚復以至寒之藥下之不惟無



益而害母命也多矣。古人用藥深于用意。子死之理有二端。用藥寒溫各從其宜。如娠婦胎漏血盡子死者。有墜墮顛撲內傷子死者。有久病胎萎子死者。以附子湯進三服。使胞藏溫煖。凝血流動。蓋以附子能破寒氣墮胎故也。若因傷寒熱證溫瘧之類。胎受熱毒而死。留於胞中不下者。古人慮其胎受熱毒。勢必脹大難出。故用樸硝水銀礪砂之類。不惟使胎不脹。且能使胎化爛。副以行血順氣之藥。使胎卽下也。

熱病胎死腹中。新汲水濃煮紅花汁。和童便熱飲立



效

本草經疏

妊病去胎大麥芽一升蜜一升服之即下

金

齊仲甫曰墮胎後血出不止一則因熱而行一則氣虛不能斂瀉血多者必煩悶而死或因風冷墮胎血結不出搶上攻心煩悶而死當溫經逐寒其血自行若血淋漓不止是衝在氣虛不能利制故也宜膠艾湯加伏龍肝散

雄按有無故墮胎而惡露全無者此血虛不能榮養如果之未熟而落血既素虧不可拘常例而再妄行其痰也



問何以知胎死曰面赤舌青母活子死面青舌赤子  
活母死面青俱青子母俱死死胎胎死面青舌赤子  
產不同

雜按吳鞠通曰死胎不下不可立期執成方而悉用  
通法催生亦然當求其不下之故以參以臨時所現  
之脈證若何補偏救弊而胎自下也余謂諸病皆  
爾不特下死胎也

又按寓意草有用瀉白散加芩以下死胎之案  
可見人無一定之病病非一法一可治藥無一定之  
用隨機應變貴乎用得其當也



又按許裕卿治邵涵貞室娠十月不產不敢執  
意憑脈問諸情況異孕非病但云孕五月以後不  
動心竊訝之爲主丹參一味令日服七錢兩旬餘  
胎下已死而枯其胎之死料在一月不動時經年  
在腹不腐而枯如果實在樹敗者必腐亦有不腐  
者則枯胎之理可推也余謂此由結胎之後生氣  
不旺未能長養萎于胞中又名僵胎亦有不足月  
而自下者併有不能破胞而自落者余見過數人  
矣若胎已長成豈能死于腹中而不爲大患至年  
餘而始下哉惜許君言之未詳也丹參袋于行血



專用能下死胎凡胎前皆宜慎用世人謂其功兼  
四物以之安胎因而致遠其墮而人不知之余見  
亦多矣

又按凡大毒大熱及破血開竅重墜利水之藥皆  
為妊娠所忌便產須知歌曰青部青蟬蟬盤盤水蛭

與蟲蟲烏頭附子及天雄野葛水銀暨巴豆牛膝

薏苡併蜈蚣三稜莪藎藎赭石芫花麝香大戟蛇蛻

黃雌雄砒石火芒硝大黃牡丹桂槐花子同此藥

何以孕婦禁服蓋能牽牛皂角同半夏製透者南

星膽製陳久兼通草瞿麥乾薑桃仁木通鋼砂乾

者不忌



桑螵蛸地膽子根與塵蟲本草綱目續曰鳥喙

側子羊躑躅藜蘆西根厚朴及薇銜欖根蘭茹葵

花子赤箭蒨草刺蝟皮鬼箭紅花蘇方木麥蘖常

山茨藜蟬錫粉礪砂紅娘子即葛上亭長硫黃石蠶竝

蜘蛛螻蛄衣魚煮蜥蜴桑蠶飛生暨鵲鷄牛黃犬

兔驢馬肉鮑鱓蝦蟇鱉共龜余又補之曰甘遂沒

藥破故紙延胡索陸五靈脂薑黃葶藶穿山甲歸

尾靈仙樟應續通王不留行龜鼈甲麻黃川椒神

麴伏龍肝珍珠犀角車前子赤芍丹參益母射干

澤瀉澤蘭紫草靈芝土瓜根滑石自犀角至此雖非傷胎之藥然



一、禾車要  
係行血通竅之品  
尚小者究宜審用  
無煩不及紫葳  
在此例  
癆雖膏藥不宜擅  
治尚宜避忌况內  
生育以酒性熱烈  
能消胎也附及之  
以為種王者  
告

附泰西諸說  
見合信氏  
體新論

女子尻骨盤內前為膀胱中為子宮後為直腸膀胱溺管一寸其下為陰道即產門也產門肉理橫生可寬可窄其底銜子宮之口陰水生焉



子宮狀若香茹。挂骨盆之內。長二寸。底濶一寸。三分內空爲三角。房一角在口。兩角在底。底角有小孔。底孔有二筋帶懸之。此帶無力。卽有子宮下墜之憂。受胎之後。漸大而圓。七月至臍上。九月至胸下。娩後復縮小。

子宮之底左右各出子管一支。與小孔通。長二寸半。垂于子核之側。不卽不離。

子核者在子宮左右離一寸。向內有蒂。與子宮相連。向外出有筋帶。與子管相繫。形如雀卵。內有精珠十五粒。至十八歲不等。內貯清液。是爲陰精。女子



入月之年精珠始生至月信絕其珠化為鳥有

男精入子宮透子宮子管罩子核子核咸動精珠

迸裂陰陽交會復入子宮結成胚珠子管漸大胚

珠漸行數日之內行至子宮生膠粒以塞子宮之

口是謂受胎婦按出各身不孕殆即核無精珠故耶

子核之內裂一珠成一孕裂雙珠即孿生若子宮

受病子管閉塞子核有恙核無精珠者皆不受孕

受孕而胚珠生二日生毛內涵清水有兩小物

浮其中一圓一長長者人也積日彌大圓者養胚

之物也積日彌小胎盤生此物即無矣二十日胚

形如大蠟二十日如牛蠟長四寸身骨可辨且



形如大蟻三十日如斗蠅長四寸身骨可辨且有  
眼模三十五日臍帶生四十二日胚有口四十五  
日初見四肢六十日手足全點始生上有耳鼻  
下有肛門是爲受形之始長一寸六十五日始生  
臍府九十日見全形男女可辨長二寸胎盤成至  
四月內外皆備長四寸五月胎動六月長六寸髮  
甲生七月長八寸骨節粗成八月長尺一寸翠丸  
由腹落入囊九月日始開長尺二寸十月胎足  
嬰兒在胎肺小肝大不須呼吸地氣故血之運行  
與出世不同妊娠二十日心已成模初見一管漸



分兩房。漸成四房。上兩房有戶。相通。此出世後不通。胎兒

之血。來自胎盤。由臍帶入一半入肝。肝逆入心。一

半入迴血總管。上達心。右上房。即過左上房。此出世後

不通。而落左下房。入血脈總管。先上兩手頭腦之內

出迴管。返心。右下房。即自入肺管。透血脈總管之

拱。此出世後不通。然後落下身兩足。兒必上。大下小。以上

身先受赤血也。于是復出臍帶。而達胎盤。改換赤

血。輪流不息。蓋以胎盤為肺用也。出世後呱呱以

啼。肺即開張。以呼吸。而心左右兩通之戶。即閉塞

若不開。紫血與赤血併。兒即死。而身青矣。雄按人身圖說



云胎居于宮以臍帶吸取母血  
養之有如樹木以根吸取土澤

胎盤俗名胞衣乃胚珠之毛黏子宮內膜而生其  
毛漸變爲血管三月成盤形圓徑五寸厚一寸其  
體半爲孕婦血管半爲胎兒血管孕婦脈管甚大  
銜接兒血管滲洩精液以養之臍帶一頭連胎盤  
一頭連兒臍中空成管外有兩脈管繞之兒生之  
後母子血管截然分張或有胎盤未離血管半斷  
則血暴下

乳者赤血所生乳頭之管漸入乳分如樹分枝行  
至乳核即與血管相接乳汁由是化成月水乃



子宮所生之液。以備胎孕之需。非血也。雄按所云非血者言

非灌輸脈絡榮養白骸之常血。或無孕之時可以

按月而行。然亦需氣血以生化。或氣血衰則身水

少。若月水過多。則氣血亦耗也。

禽不雄而卵。伏而不孵。蛭蛤之屬。常雌出卵。雄出

其精以護之。身負而行。精不入腹。蚯蚓雌雄相交。

兩皆成孕。草木以中心為雌。花須為雄。風吹鬚粉

散落于花心。膠液接之。乃能含仁結子。若去其鬚

即不實。雄按騰蛇聽而有孕。白鷺視而有胎。造化

論又云。中外之人。貌有不同。而藏府氣血無不同。

者且說理最精。並非虛揣空談。爰錄如右。以資參

考。其精詳之數。似未可泯。

卷上終







